

Servicio Cultural ta di fiesta cu su 35 aniversario



ORANJESTAD-- Departamento di Cultura Aruba (DCA) ta den su fase nobo y pronto lo muda pa otro edificio, pero manteniendo su maneho riba cultura. Cultura como parti integral y fundeshi di un sociedad cu su dinamismo durante temponan. DCA ta stimula, promove y mantene nos cultura pa e siguiente generacion. Durante e 35 aña di servicio cultural na Aruba, e instancia gubernamental aki antes como Instituto di Cultura Aruba (ICA) y awendia como Departamento di Cultura Aruba

ta carga e maneho cultural di nos pais. Antes como ICA, hopi ta esnan cu ta corda, tabatin e feria popular, intercambio vacacional, Watapana Festival, Bonbini Festival, Proyectonan di Teatro den bario djis pa menciona algun. Awe DCA a conoce un cambio y ta den fase riba maneho cultural y varios ta e proyectonan escolar manera Contacto Cultural, Dia di Himno y Bandera, Fiesta di San Juan. Pa nos hobennan tin Competencia Literario Arte di Palabra, Competencia di Poesia, Competencia Hubenil

Gang di Arte cu aña pa aña tin un acogida grandi entre nos hobennan dunando nan oportunidad di cera conoci cu arte y profila nan talento artistico. Dentro di e dinamismo cultural DCA sigur lo sigui duna atencion na otro proyectonan cu ta di suma importancia pa nos comunidad cu ta trata di proyectonan di integracion. Tambe crea cooperacion cu departamentonan y instancianan gubernamental y no gubernamental pa asina fortalece un base amplio riba tereno cultural pa genera mas participacion den nos sociedad.

Pa trece un atencion riba e importancia di conscientisacion cultural mester duna mas bida na diferente otro aspectonan cu tambe ta di suma importancia pa un comunidad den desaroyo. Entre esakinan ta bini dilanti e importancia di e bon uzo y conocimiento di nos dushi idioma Papiamentu, fortalece nos norma y balor, yuda cuida y proteha nos herencia y patrimonio cultural. Sin sali di e perspectiva mas importante cu te e desaroyo cultural y educacional pa no perde e vision y ni lubida respet, tol-

erancia cu e base di tur esaki riba e manera con nos ta cana y anda cu otro. Tur esaki ta keda concentra riba e frase di nos prome director Sr. Hubert Lio Booi cu ta bisa: "Pone e Arubiano na altura di su cultura y siña conoce di otro" y den contexto mas actual DCA cu e lema cu ta bisa: "Cultura ta nos". Sin duda esaki lo ta e lema di integracion, unidad y cu Aruba lo sigui scucha cu mas frecuencia. Esaki lo bira e brug pa carga nos balornan cultural. Pabien Aruba cu bo 35 aniversario di Servicio Cultural. □